

職方典第一千四百三十五卷

梧州府部彙考七

梧州府獠獠峒蠻考

漢

安帝元初三年蒼梧鬱林蠻反遣侍御史任連討之 按後漢書安帝本紀云云

三國吳

魏延康元年吳交州刺史呂岱討鬱林蠻 按三國吳志吳主傳不載 按呂岱傳延康元年

岱代步騭爲交州刺史鬱林夷賊攻圍郡縣岱討破之

唐

代宗大曆 年容管經略使王翃獲賊首梁崇牽容州平 按唐書代宗本紀六年三月王翃

敗梁崇牽平容州 按府志王翃大曆中爲容管經略使初蠻獠梁崇牽覃問等煽亂據容

州前經略使皆倚治梧翃曰我容州刺史也必得容乃止卽出私財募士有功者許署吏於是

人皆感奮不數月斬賊帥歐陽珪因至廣州請節度使李勉出兵併力勉不許翊曰大夫卽不出師願下書州縣陽聲以兵爲助冀藉此聲成萬一功勉許諾乃移書義藤二州刺史約皆進討卒破賊擒梁崇善悉復容州故地捷聞詔更置順州翊凡百餘戰擒首領七十復遣將李實等分討西原平鬱林諸州累兼御史中丞招討處置使

元

世祖至元年安撫司朱國寶招降黎戶按元史世祖本紀不載按府志至元間朱國寶以管軍萬戶鎮守梧州路安撫司事開誠示義降黎民三千戶蠻峒三十所

明

孝宗弘治年懷集知縣區昌安插諸徭屯種按府志懷集銅鐘古城下帥湯水黃潭麻蕉石角金鵝松柏諸山岡徭獠雜居與清遠之大羅連山之上帥馬鹿陽山之蕭陀白芒賀縣之深埔開建之白蓮水瀉互相結援肆劫爲民患久矣弘治間懷集知縣區昌遣人齎榜招之又徭首黃法清管領耕種

世宗嘉靖十一年征七山猺不克 按府志十一年征七山諸蠻六埔思連攬田古磊等七山壤接蒼藤猺民唐宗欽等恃其險衆出刼仁封須羅等鄉督府陶諧調兵萬餘分二哨逕勦賊覺先遁兵還

三十一年總督應檳征七山猺平之 按府志三十一年復征七山賊七山三十七巢據蒼藤岑之中周遭二百餘里屢征不服總督應檳與叅政張謙定計調兵以左叅將王寵右叅將朱昇分統之佯爲西征兵至潯州旋師兼程而進晨及賊境賊覺始奔乃下令曰賊今據高其勢方銳不宜仰攻但使不得逸候其敝擊之可破也賊果窘飢死強半擒斬二百八十餘級遂籍其田廬

三十二年七山猺復叛 按府志三十二年七山猺曾盤宗昌叛分守叅政鄭綱討平之

神宗萬曆四年七山猺來歸納之 按府志四年七山下城連城北科諸猺歸順諸猺畏羅旁兵威願歸就編民計田入賦

萬曆六年賊首潘積善等作亂總督凌雲翼諭降之 按明外史土司傳萬曆初岑溪潘積善

按府志十二年陽山蘇朝鮮越湓峒爭田羅廷朝告立兵營防守知縣林春茂踏看營地瘠人

蔡國昇殺廷朝碎其尸既擒國昇其黨譚石泉空峒竄入古城賊首鄭明端主之挾山峒爲變會開建峒蠻巖秀珠刼掠三邑而深埔金鵝松柏古城連峒水瀉白蓮空巢以從總督吳文華題請勦滅擊東山精兵及歸順戍卒七千餘名征勦一十五峒生擒七十餘賊俘馘七百餘顆諸山震懼復招殘孽趙江譚石泉等百餘人丈出本峒田畝撥與耕兵住種移慈樂巡司於金鵝移蘭峒巡司於青水尾坐鎮官督營兵戍守古城龍塘二處

梧州府部藝文一

讓容州表

唐元結

臣結言臣伏奉今月二十二日勅授臣使持節都督容州諸軍事守容州刺史中丞充本管經略守捉使四月十六日勅到二十一日發付本道行營臣愚弱謬當寄任奉詔之日不獲辭憂懼臣結申謝臣聞孝於家者忠於國以忠事君者無所隱臣有至切不敢不言臣實一身奉養老母醫藥飲食非臣不親慙爾違離則憂悸成疾臣又多疾近日加劇前在道州詎勉六歲實無理政多假請停官司不許今臣所屬之州陷賊歲久頽城古木遠在炎荒管內諸州多未賓服行營野次向十餘年在

臣一身爲國展効死當不避敢憚艱危但以老母念臣疾疹日久時方大暑南逾火山舉家漂泊寄在湖上單車將命赴於賊庭臣將就路老母悲泣聞者悽愴臣心可知臣欲扶持版輿南之台浦則老母氣力難於遠行臣欲奮不顧家則母子之情離畜猶有臣欲久辭老母則又汗辱名教臣欲便不之官有恐稽違詔命在臣肝腸如煎如燭昔徐庶心亂先主不逼令伯陳情晉武允許君臣國家萬代爲規伏惟陛下以孝理萬姓慈育生類在臣情志實堪矜愍臣每讀前史見吳起遊官噬臂不歸溫嶠奉使絕裾而去常恨不逢斯人使之殊死臣所以冒犯聖旨乞停今授待罪私門長得奉養供給并稅臣之懇願塵瀆天威不勝惶恐謹遣某臣奉表陳讓以聞

再讓容州表

前人

草土臣結言伏奉四月十三日勅以臣前在容州殊有理政使司乞留以遂人望起復守金吾衛將軍員外置同正員兼御史中丞使持節都督容州諸軍事兼容州刺史充本管經略守捉使賜紫金魚袋忽奉恩詔心魂驚悸哀慕悲思不任憂懼臣某申謝臣聞苟傷禮法妄蒙寄任古人所畏臣敢不懼國家近年切惡薄俗文官優免許終喪制臣素非戰士曾忝臺省墨衰戎旅實傷禮法且容州

陷沒十二三年管內諸州多在賊境臣前行營日月甚淺宣布聖澤遠人未知有何政能得在人口使司過聽誤有請留遂令朝廷隳紮法禁至使愚弱穢汚禮教臣實不敢踐古人可畏之跡辱聖朝委任之命敢以死請乞追恩詔前者陛下授臣容州正任道州刺史臣身病母老不敢辭謝實爲道州地安數年祿養容州破陷不宜辭避臣以爲安養其祿蹈厄不免乃人臣之節其時臣便表表陳乞以母老地遠請解職任陛下察臣懇至追臣入朝臣以爲不貽憂歎榮及膝下人子之分不圖恩勅未到臣丁酷罰哀號冤怨無所追及今陛下又奪臣情禮授容州臣遂行則亡母旅櫬歸葬無日几筵漂寄奠祀無主捧讀詔書不勝悲懼臣舊患風疾近轉增劇荒忽迷亡不知自覺餘生殘喘朝夕殞滅豈堪金革能伏叛人特乞聖慈允臣新授官誥令臣終喪制免生死羞愧是臣懇願臣今寄永州請刺史王庭璈爲臣進表陳乞以聞

爲容州竇中謝丞上表

劉禹錫

臣某言伏奉某月日制書授臣容州刺史中丞充本管經略招討等使臣發開州日已差某奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術

頃因多幸貴自丘園累沐聖慈驟居清貴識昧通變動乖事宜愧無善狀以塞公責伏惟睿聖文武
皇帝陛下凝旒穆清洞照寶海推共理之義分寄股肱念烝父之勤溥霑遐邇察臣前任事實忍臣
本性愚戇賜以恩輝投於廢棄遠辭偏郡重委方隅捧印綬以爲榮望闕庭而增戀雖到官之始惠
未及人而率下之誠務先克己凡施政教皆稟詔條參以土宜遂其物性可行必守有弊必除使蠻
獠生梗之風慕臣子盡忠之道力誠不足心實在茲伏乞聖明俯賜昭鑒

唐檢校右散騎常侍容州刺史李公去思頌

并序

李罕

維貞元二年秋八月天子以郡國二千石之高第者曰隴西李某利澤施於裔土美化被乎遐眚是
用遵虞書陟明之義參周官進律之典俾之由檢校右散騎常侍兼御史中丞容州刺史本管經略
守捉招討處置等使實授兵符加擁使節某月自合浦如南海於是縣道豁谷饌寡孤老泊於士吏
相與懷思隱然不去乎心森然不離乎目願所以昭明其德光示於後嶺南經略使判官權知容州
留後事監察御史襄行同郡李罕始以文學居辟選之首遂參帷席復以謀能當器任之重留總軍
府美公之政大備感公之禮有加因其人之請而上之上可其奏夫其郡之四封濱於百粵外則有

山寇海孽比境集處之虞內則有勤戍勞師流散轉徙之弊親帥其下以撫吾人慰藉傷瘵安集疲耗懼貧貢之闕至助之以家財憫徭事之繁至代之以私屬選武藝歸老疾罷減塞卒四千餘人以趨農時率游惰闢汙萊開置屯田五百餘頃以足軍實舍寇賊之爲縲囚者釋而遣之以除其怨而阻獷以順禁人民之相虜賣者執而誅之以去其害而童昏以安常歲有災澼災而連燒於廬舍公創其制以禦其鬱攸而邑居以葺舊俗多怨睚眦而致毒於飲食公立其防以解其悁忿而鄉黨以和樹枝幹而啟閉畢修列亭燧而厄害斯控差重輕以行徵令無不均之議量遠近以納貢職無不供之貢人用富庶家有儲峙敦之以禮懷之以仁潔己而不污未嘗有貧貸勤身而不怠未嘗有懈弛明足以照遁情隱隱而不爲察威足以制猾人暴吏而不爲苛古之良能何以加此惟我有堂宗室枝屬之選監州刺史諱孝詵府君之曾孫弘農郡太守諱璟府君之孫太子太傅贈司徒諱齊物府君之子續洪緒丕續之餘裕弘休純懿之下鍾寬博而柔良稟高明而疏達根於經義飾以藝文故其仕王畿宰京邑累執憲簡且登輶車備重臣賓介之職居大府紀綱之任三亞京尹兼中師之責復爲宮相在常伯之位歷饒州刺史而後至是州恩結於人功加於物必聞理效而興頌聲且

夫有美焉有刺焉詩人之義也善善而褒之惡惡而詘之春秋之事也使賢士大夫之業不沒於後太史公之制也以余之嘗修史記而爲訓辭緣人之懷心而頌之曰帝念南方迫界蠻獠人新被化歲或被寇歲或勞師屬之於公俾養牧之匪直勤身亦帥其屬贖我貧匱宇我惇獨息人便農墾田積粟修其教化被以威德賊害既除禍災斯息完我廬舍親我骨肉咸保其生且易其俗蚩蚩羣族孰不蒙福播爲頌聲公受百祿彤弓旅矢以長諸侯人之懷德勒石垂休

漫泉亭賦

宋陳洙

漫泉唐元子漫叟所銘冰泉也去今七百餘年泉湮銘石廢亦其宜矣然銘字盡泐獨元子官名尙存若冥護然者吁亦異矣哉今御史大夫崑山葉公重元子仁政庸箴有官以迪民教作廢而易名蓋非細故也公又紀文於石而亭覆其上洙爲之賦義無他取亦同歸於賢賢而申警在位焉耳其辭曰天與貞良七葉中唐令望漫叟漫郎繫大曆之初載駐玉節於南荒論蠻酋而王化洽綏八州而民事康爰顧以瞻曰此邊土政雖少紆俗或未煦乃駕輪車乃歷險阻乃采風謠以問疾苦於時蒼梧東灘水北地闢元脉決決涓涓盈盈渼渼注體泉之芳溶溜石髓之香液匯六月之甘寒

貯兩涵之深碧挹之而杯勺冰漸歃也而齒牙霜刺清飊颯兮淒容露月湛其流魄斯媿潔於襜帷
又鑑榮於繁戟心爾醒兮澄涼熱斯濯兮疏澤於是俯而歎仰而興佚休沐美命名曰冰代堅貞於
星魄繹鴉思以鐫銘穹龜負兮屹屹蟠螭紐兮亭亭麗林谷兮鳳鸞翥燭天壤兮奎章明雖星移以
物換愈境勝而地靈火山畏滋而收燄疾疫飲潤而攸寧亭累廢而累植卒昭爍於遐齡聖明盛世
用賢致理盡嶺海之瘡痍出弼臣之德履冠冠兮戢戢繡衣兮煒煒曰撫曰巡於皇至止莽四瞻兮
就湮碑一角兮無幾洗蝸篆於薜青剔蚓文於苔紫固皆殘蝕之無餘僅存官名於元子噫嘻殆天
乎哉光有唐而斂席位表楨幹於賢才擢忠貞而偃蹇庇民物而勞來眇遺文之光燄曉誦讀以增
懷今復全名於毀石夫豈人力之能爲矧於泉而固休澤之儼在抑茲州而又仁愛之所遺忍置焉
而不治於以慰遺黎之永思乃鳩而工乃斲而木爰葺爰營紀勒貞玉易漫以冰兮人政之潔浮於
泉冠泉以亭兮蓋因泉以覆屋庶登斯亭也曰元子也仁明之牧而觀斯泉也昔冰寒於水今冰凜
於人甯不澡煩洗熇引後兮光明所係兮匪獨敦民教兮警士風夫豈適觀遊兮而於斯取繇亂曰
有唐元子賢也哲兮世皆溷濁彼獨潔兮受命南綬駐玉節兮嗜泉甘寒曰冰冽兮刻以銘詩薄莫

竭兮後百千年石殘缺兮不有君子澤其替兮易名覆亭匪遊資兮爾古爾今民幾隍兮契仁於斯
庶啞啞兮凡百有官佩章曳兮履亭誦文嚙冰於熱兮豈惟泉時漂兮去吾民憂永忘悵悵兮

六賢堂記

舒勉

六賢謂漢陳欽欽子元元子堅卿士燮燮弟士壹子厥按後漢三國志陳欽廣信人也欽字子佚與
劉歆俱治左氏春秋而欽別自名家後爲將軍元字長孫以父任爲郎少傳父業爲學者所宗建武
初抗疏論立左氏傳與乞宣令司隸校尉督察三公帝從之乃數陳便宜不用以病去終老於家堅
卿有文章而史逸其論撰燮字威彥漢末舉茂材累遷交趾太守學問優博達於從政而謙虛下士
方中原阻兵士人避難者多往依之卒年九十一初爲郡督郵辟司徒掾雅爲黃琬器重董卓亂乃
亡歸因表爲合浦太守孫權據吳南據交廣燮以厥入質權以厥爲武昌太守六賢之見於史者其
本末梗槩如此而蒼梧之人未嘗究知太守李公享伯好古樂善歷求漢唐以至本朝得名臣鉅公
有典是郡者七人焉旣立堂祠之於冰泉之上以慰邦人之思又卽疊舍塑六賢之像并以其本末
刻之於石使學者歲時具香火謁先聖已則退而旅拜六賢於祠堂之下瞻其像想見其風采而生

希慕之心如在鄉黨焉其敦勸誘掖可謂至矣孟子曰舜何人也予何人也學者姑勉之異日有繼六賢之後父兄弟名重一時光傳青史者無忘吾太守李公敦勸誘掖之力也

勾漏山寶圭洞天十洞記

吳元美

天下洞凡三十有六容南西及鬼門關內一郡而得三焉南郡嶠北白石西勾漏西山之南去郡一舍而近銅州古地平川中石蜂千百皆矗立特起過圍二十里其巖穴多勾曲穿漏故以是名予足跡半天下所聞名山多矣卓絕雄傑鮮或儷此者愛而不可失列爲十圖置座右朝夕自其外而想其內外所見者毫楮可及然特彷彿一二耳若三洞中所有須至者自知譬如乾坤之容日月之光安可繪畫也

靈寶觀

度西山巔涉落桑江豁然川夷野曠中石山綿延直抵北流之西其南跨大江之半勾漏城也距今邑凡十里羣峯屹然如中天觀闕旌旄堅戟武庫五兵森羅在上而道出其間行者皆驚愕不敢前靈寶觀蓋直當其門戶觀後石峯千仞獨以一柱擎天而朝宸奎閣藏其跡案圖經此有觀久矣南

漢始更今名殿庭卑隘門徑荒蕪碣碑可考可詢令人慨嘆不已然土木雖儉陋而氣象雄古雲物輪菌真仙靈所宅香火迅掃雖無人而圭璧照耀雲漢昭回自有神物護持之左右數里雖絕無居者豈仙聖之意樂閒曠厭囂煩故不欲塵井畜牧之混其所也觀東百餘步臨大道旁有龍潭洞披荆榛而入俯伏蹲踞淵淳幽闕冷襲毛骨柯眈云神龍所蟄伏勿以瓦礫投也觀後二小洞南向者曰太陽有浮屠像其北曰太陰淺塞不通然名義無所稽第恐俚語以南北分陰陽耳故附書之或有知其詳者

寶圭洞

由觀後西北行二百步山如倚屏門闢象魏榜其上曰勾漏洞天正寶圭洞此葛仙翁修煉所也洞前小亭俯瞰橫塘倚欄四顧則列峯回環環如星之拱北辰其魁礪而秀偉者稷契皐夔冠弁圭璋以待堯舜其挺特雄毅者韓彭吳鄧戈矛劍戟之衛高光也石室中有玉宸道君及葛真人石像云五季時迎自南海石室之東爲寶圭洞雄偉壯觀秉燭而入有丹竈牀几盤饗礪曰皆石乳自然凝結而舊成傳以爲遺物之餘奇怪萬狀神募鬼刻非人間所有約半里水涯循梯直下擎竹筏以行

歷甕門三四重間關委蛇斷簪不添膏莫能及而回翌巨棹小舟以往乃窮水際益廣益奇波光澄
明蒸藹溫燠嚴冬如三四月時同遊者驚駭以爲神龍窟中不可久居及歸中流矯首見一點燈如
長虹出天表蓋石罅之容光也拾舟躡梯攀躍而上曲磴飛棧敕點如瑤階雲徑小石羅列如瓊盃
玉甃瑣碎如楊梅荔枝充實其內不可名狀轉側容跬愈巧直穿太陰洞後半山而出蓋寶圭之東
掖也其中室曰蟠桃深三四百步仰視高處杳不見頂然蟠桃之名圖經不載他無所考據其西小
室洞明外達連榻週遍可踞可臥蓋寶圭之西掖也嚮予嘗遊都嶠怪其山奇秀穴巖在下其色黑
青而多膏乳每疑二洞所受陰陽之殊近見寺丞王君云凡陽洞靈仙所宅陰洞鬼神所居勾漏陰
洞也抱朴乃於此修煉者蓋寶圭衆峯左右拱揖受陽和之氣水火既濟故能成功亦如男子通身
皆陽獨尾闕穴屬陰女子通身皆陰獨玉泉穴屬陽此造化妙用處葛君深知之予謂其語頗有理
遂記於此以俟識者 按稚川求爲勾漏令曰非欲爲榮以有丹砂耳遂攜家往於羅浮止焉是稚
川原未至勾漏也而今古詞人品題勾漏輒以稚川實之夫勾漏秀起西陸非至人不足爲山靈
重而至人周流八極與風雲上下庸知勾漏非所登涉乎世傳呂仙詩曰朝遊北海暮蒼梧余於

稚川云則謂勾漏有稚川也固可矣

白沙洞

予生平俗眼未嘗觀寶圭之勝以爲天下極美而客有言曰白沙其尤美乎予聞喜而不寐黎明杖履崎嶇亂石間秉燭從竇入俯偃扶伏凡經六七竇所過益寬而所見益奇行里餘乃至中洞縱廣一頃高數十仞石膏玉英散彩流光大者齊雉堞小者雜毫芒壁奎交加星宿焜煌愈於寶圭不可爲量數仰睇之如崩雲如飛幄如棟樑如棖桷俯盼之如驚湍如怒濤如畦畎如兵阿如鼙鼓如籩豆祝敔笙竽之爲禮樂器者如弧矢刀劍戈矛甲冑之爲兵戎具者如杵臼犁軸瓶罍饔飧爲農庶家所費用者如塔像臺案幡鐘磬爲僧道所居嚴設者如齋縞吳紵霜縑霧縠其文彩鋪張於拖架如壁楚璞圓環方決其雕琢堆疊於府藏其朴如簣桴土鼓其奇怪如神鬼形狀千巔萬壑不可殫盡或考擊之則鏗然如洪鐘轟然如震雷勵然如長風吼衆籟泠然如飛瀑瀉谷令人神思飛揚形容不逮但索筆書曰勾漏甲於天下而此洞爲勾漏第一旣而俯視之於下有涸井數十皆舊時采砂處凡砂生於此獨白蓋坎離之交自然變化若非鉛石有假人力也予俯拾之得數塊如粉道人